



FASNACHTSCLIQUE  
**JUNTERESSLI**

Fasnacht 2015

## **Viva Antidepressiva!**

### **Drei Dääg Gligg uff Zyt**

Mi Schädel brummt schreggligg fest, oh-ohohoh!  
Was isch numme gange, wär bini und wo?  
Amsle wo pfyffe und langsam wird's häll,  
E Larve im Arm - und Röppli im Fäll?  
Oh Mann sag wie kunnt jetzt dä Hundsdrägg derzue,  
Dass er saftet und jääselet under mim Schueh?  
Isch Donnshdig, isch Fasnacht gsi, wär weiss dasgnau?  
Ins Bett isches wyt und der Himmel wird grau.  
Dä päpstligi Brunne do kunnt mr grad glääge,  
Perfäggt für mi Schueh, und mi Grind au e Sääge.  
E Wassersprutz kalt übers Gsicht abegloh,  
Und d Wält gseht schon besser us – ho-hohoho!

Ä Kiosk hett scho offe – ä BaZ ligt im Fänschter;  
Ä Witz oder e Zitig für Zombies und Gschpängschter?  
I glaub i muess schnäll d Apothek konsultiere:  
Ä Pille in d Schnuure das duet mi sediere,  
I föhl mi uff eimol so wohlig und liicht.  
Was gsehni, wo dört wiene Krokodil schliicht?  
Ä Drämmli – uf d Site – sunscht wird i no gfrässe!  
An dr Haltstell stöhn Härde vo sältsame Wäase:  
Ä Waggis, ä Chue und e Blätzlibäiass,  
Ä gwagglige Altfrangg lauft einsam dur d Gass.  
Das Wasser dört unde isch sicher dr Rhy  
Mir gohts hütt glänzend – hihi-hihihi!

Orangsches Liecht an dä Huswänd zeigt a:  
D Equipe wo d Stroosse dien butze sin dra.  
No Obe? Scho Morge? Die Frog blibt mr offe  
Dr Morge bringt Unglück und zobe bisch bsoffe  
Dr Grabe wird tiefer wär arm isch wär riich,  
Betroffe machts morn, aber hüt ischs mr gliich.  
Drum gangi jetzt grad none Schlubä go nä!  
Über d Gass? In der Beiz? Und wär nimmt,  
wär mues gäh?  
Das Spili, das kenn i doch – Biire und Nuss:  
Biff-baff-buff Job wäg und plötzlich bisch duss.  
Ä Schuumwäie hilft gege Wältschmärz-weweh,  
Grad jetzt gohts mir besser als dir – hehehe!

Villicht sötti besser e Taxi go schnappe?  
Do kunnt schone silbrige stretschige Schlappe:  
Hop hinde ine und d Türe goht zue,  
Uff eimol isch still und so hani mi Rueh.  
Numme macht jetzt mi Kater so richtig Radau,  
S Kopfweh wird stärker, auau-auauau!  
E Stopp und i stand wieder duss uffem Pflaschter  
E Pille in Hals – oder isch das grad s Laschter?  
Zwüschem End- und em Morgestraich schint mr mis  
Lääbe  
Im Schrubschtock verschrubt, en Usbruch vergäabe,  
Mit – dank mine Laschter - e bitz schubidu.  
Also jetzt isch s mer me nach huhu huhuhu.

I könnt mi doch do uff das Parkbänggli leege,  
D Larve als Küssi und nüm gross beweeye.  
Kasch dängge, das Bänggli foht grad afo dräie  
Über d Hüser und d Böim bis ins Rich vor de Grääie...  
Jetzt numme nit gheie – eh dasch jone Spatz?!  
Do rieht öbber näbe mir: mache Sie Platz!  
So hogge mr do und wüsse nüm witter.  
Si schwätzt uff mi i, mi Spanisch isch schitter,  
Worum numme lacht si denn, lacht si mi us?  
Mis Fäll, mini Röppli? Ah jetzt chumi drus,  
Sisch simpel und eifach: So Lache steggt a,  
Die bescht Medizin überhaupt - hahaha!

---

Mechtsch aaf Pfyffe oder Drummele, bisch mindischdens  
7 Jahr alt und hesch Luscht zem sälber Fasnacht mache?  
So mäld dy lieber hit als morn bi unserer Obfrau vo dr  
Junge Garde, dr Fränzi Moning, fraenzi.moning@bluewin.ch

---

*D Ladäärne-Uusstellig uff em Minschterplatz und  
d Waage- und Reggwisyte-Uusstellig bi dr Kasäärne  
sin vom Määntig znacht bis am Mittwoch demoorge!  
Deert und an de 3 Verkaufsständ (CINS) in dr Stadt ka  
men au alli Zeedel und Schnitzelbängg, d Blaggedde  
und dr Rädäbäng kaufe.*

*Am Fritig und Samschtig, 26. und 27. Februar isch  
Noochwuggswärbig vo dr 1. Lektion im Zält uff em Barfi.*

*D'Zeedellääsete isch am Sunntig noh dr Fasnacht 2015 am  
1. Merze im Käller vo dr Baseldytschi Bihni im alte  
Lohnhof, 17 – 19 h. Dr Ytritt isch frey, ,s Drimmelikässli  
hänggt aber am Usgang fir freywilligi Spände an dr Wand.*